

Na osnovu člana 15. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, br. 49/06 i 51/09) i člana 69. Statuta Općine Centar Sarajevo – prečišćen tekst („Službene novine Kantona Sarajevo, broj: 23/04) Općinski načelnik donosi:

PRAVILNIK

O NAGRAĐIVANJU USPJEŠNIH MLADIH POJEDINACA SA PODRUČJA OPĆINE CENTAR SARAJEVO

I- OPĆE ODREDBE

Član 1.

Ovim Pravilnikom utvrđuju se osnove, način i kriteriji nagrađivanja uspješnih mladih pojedinaca sa prebivalištem na području općine Centar Sarajevo (u daljem tekstu: Općina).

Nagrade se dodjeljuju za osvojeno jedno od prava tri mjesta na kantonalnim, federalnim, državnim, evropskim i svjetskim takmičenjima iz oblasti obrazovanja, nauke, kulture i sporta, kao i za prepoznati socijalni i društveni angažman pojedinaca.

Nagrade se dodjeljuje i dobitnicima priznanja „Zlatna značka“ i „Srebrna značka“ Univerziteta u Sarajevu.

Član 2.

Cilj nagrađivanja mladih je poticanje izvrsnosti i posvećenosti obrazovanju, nauci, kulturi, sportu, isticanje i promocija pozitivnih primjera u lokalnoj zajednici, motivacija mladih za učešće i postizanje što boljih rezultata.

II- PRAVO I USLOVI

Član 3.

Pravo na dodjelu sredstava može ostvariti pojedinac uz ispunjavanje sljedećih uslova:

- a) da je državljanin Bosne i Hercegovine,
- b) da ima prebivalište na području općine Centar Sarajevo u neprekidnom trajanju od godine dana do dana podnošenja prijave,
- c) da ima postignut rezultat - osvojeno jedno od prava tri mjesta na kantonalnom, federalnom, državnom, evropskom ili svjetskom takmičenju,
- d) da je u starosnoj dobi od 12 do 30 godina.

Član 4.

(1) Sredstva se dodjeljuju iz Budžeta Općine, na osnovu raspisanog Javnog poziva i podnesenih zahtjeva po istom.

(2) Javni poziv se objavljuje na web stranici Općine i ostaje otvoren do kraja tekuće godine, odnosno do utroška sredstava planiranih za ovu namjenu.

(3) Zahtjevi za nagrađivanje se dostavljaju službi nadležnoj za obrazovanje, nauku, kulturu i sport (u daljem tekstu: Služba) elektronskim putem ili putem protokola Općine.

Član 5.

(1) Zahtjev za nagrađivanje podnosi se za rezultat ostvaren u tekućoj kalendarskoj godini.

(2) Podnosilac zahtjeva može aplicirati jednom u toku kalendarske godine.

(3) Dostavljeni zahtjev će se riješavati po vremenu dospijeca.

(4) Isplate sredstava pojedincima koji su ostvarili pravo na nagradu, dodjeljivat će se prilikom svečanog prijema u povodu obilježavanja značajnih datuma i to:

a) 01. mart – Dan nezavisnosti Bosne i Hercegovine,

b) 08. maj - Dan mladih Općine Centar Sarajevo,

c) 12. august – Svjetski dan mladih

d) 25. novembar – Dan državnosti Bosne i Hercegovine i

e) 31. decembar – obilježavanje Nove godine.

(5) Služba je dužna sve pristigle zahtjeve riješavati u roku od 15 dana od dana prijema, te obavijestiti podnosioca zahtjeva o odluci i terminu svečanog prijema.

Član 6.

(1) Uz zahtjev je potrebno priložiti slijedeće dokumente (orginal ili kopija):

a) uvjerenje o kretanju lica koje je ostvarilo rezultat na takmičenju,

b) dokaz ili potvrdu o ostvarenim rezultatima na kantonalnom, federalnom, državnom, evropskom i svjetskom takmičenju u tekućoj kalendarskoj godini, izdate od nadležne institucije ili organizatora takmičenja,

c) motivaciono pismo lica koje je ostvarilo rezultat,

d) ugovor ili potvrda banke o otvorenom tekućem računu.

(2) Podnosilac zahtjeva koji aplicira za nagrađivanje iz oblasti socijalnog i društvenog angažmana dužan je dostaviti i peticiju ili preporuku neformalne grupe građana, nevladine organizacije, ustanove ili institucije kojom dokazuje svoj angažman u zajednici, a koji je od značaja za Općinu.

Član 7.

(1) Sredstva za nagrađivanje obezbjeđuju se iz granta Podrška mladim uspješnim pojedincima, dobitnicima najvećih priznanja i nagrada (u daljem tekstu: Grant)

(2) Neiskorištena sredstva iz Granta u jednoj godini prenose se u narednu godinu.

Član 8.

(1) Visina novčane nagrade utvrđuje se na osnovu nivoa takmičenja i ostvarenog rezultata na istom, i to kako slijedi:

a) Visina novčane nagrade za ostvarene individualne rezultate:

NIVO TAKMIČENJA	I mjesto	II mjesto	III mjesto
SVJETSKO TAKMIČENJE	1500,00 KM	1200,00 KM	1000,00 KM
EVROPSKO TAKMIČENJE	1000,00 KM	900,00 KM	800,00 KM
BALKANSKO/REGIONALNO TAKMIČENJE	700,00 KM	600,00 KM	500,00 KM
DRŽAVNO TAKMIČENJE	400,00 KM	350,00 KM	300,00 KM
FEDERALNO TAKMIČENJE	300,00 KM	250,00 KM	200,00 KM
KANTONALNO TAKMIČENJE	150,00 KM	100,00 KM	70,00 KM

b) Visina novčane nagrade pojedincu za ostvarene rezultate u parovima ili ekipnoj konkurenciji:

NIVO TAKMIČENJA	I mjesto	II mjesto	III mjesto
SVJETSKO TAKMIČENJE	500,00 KM	450,00 KM	400,00 KM
EVROPSKO TAKMIČENJE	400,00 KM	350,00 KM	300,00 KM
BALKANSKO/REGIONALNO TAKMIČENJE			
DRŽAVNO TAKMIČENJE	300,00 KM	250,00 KM	200,00 KM
FEDERALNO TAKMIČENJE	200,00 KM	150,00 KM	100,00 KM
KANTONALNO TAKMIČENJE	100,00 KM	70,00 KM	50,00 KM

(2) Ukoliko jedno lice ostvari više rezultata na istom takmičenju u različitim disciplinama, visina novčane nagrade će se utvrditi na osnovu jednog rezultata i to onog koji je najpovoljniji za aplikanta.

(3) Postavljanje novog državnog rekorda vrednovat će se jednako kao rezultat - osvojeno prvo (I) mjesto na regionalnom takmičenju.

(4) Dobitnici nagrade za socijalni i društveni angažman vrednovat će se iznosom u visini od 500,00 KM.

Član 9.

(1) Dobitnici priznanja „Zlatna značka“ i „Srebrna značka“ Univerziteta u Sarajevu u tekućoj akademskoj godini, sa prebivalištem na području općine Centar Sarajevo, ostvaruju pravo na novčanu nagradu, i to kako slijedi:

PRIZNANJE	IZNOS NOVČANE NAGRADE
ZLATNA ZNAČKA	1.000,00 KM
SREBRENA ZNAČKA	700,00 KM

(2) Podatke o dobitnicima priznanja iz stava (1) ovog člana, Služba će pribaviti od Rektorata Univerziteta u Sarajevu.

Član 10.

(1) Izuzeto od odredbi ovog Pravilnika iz člana 3. tačka b) i d), Općinski načelnik može, dodijeliti nagradu pojedincu koji ostvari vrhunski rezultat na međunarodnim takmičenjima iz oblasti obrazovanja, nauke, kulture i sporta u tekućoj kalendarskoj godini;

(2) Izuzeto od odredbi člana 4. stav (1), nadležna Služba može po službenoj dužnosti pokrenuti postupak nagrađivanja, a u skladu sa članom 1. i 8. ovog Pravilnika.

(3) Izuzeto od odredbi iz člana 5. stav (2), ovog Pravilnika Općinski načelnik, na prijedlog nadležne Službe, može dodijeliti nagradu u iznosu do 1000,00 KM pojedincima koji kontinuirano ostvaruje izuzetne rezultate na domaćim ili međunarodnim takmičenjima uz socijalni ili društveni angažman koji je od značaja za Općinu, a koji svojim djelovanjem u zajednici predstavljaju uzore mladim osobama.

III- PRELAZNE I ZAVRŠNE ODREDBE

Član 11.

Terminološka upotreba muškog i ženskog gramatičkog roda u Pravilniku podrazumijeva uključivanje oba spola.

Član 12.


Stupanjem na snagu ovog Pravilnika, prestaje da važi Pravilnik o nagrađivanju uspješnih mladih pojedinaca sa područja općine Centar Sarajevo („Službene novine Kantona Sarajevo“, broj: 20/22)

Član 13.

Ovaj Pravilnik se primjenjuje od 29.12.2023. godine, a bit će objavljen u Službenim novinama Kantona Sarajevo.

Broj: 13-11-11349/23

Datum: 13.12.2023.



OPĆINSKI NAČELNIK

Srdan Mandić
Srdan Mandić